


Recordando Ronny Brete **(Un di nos pioneronan den comunicacion)**



RONNY BRETE
Division of Learning Affairs of the Ministry of Education, Culture and Sport

Kende no conoce Sr. Ronny Brete. Ronny tabata conoci pa su trabounan radial como locutur na varios emisora di nos isla. Ademá e tabata un di e pioneronan di nos planta nacional di television y un di e prome presentadornan di noticia na nos prome planta di television, esta Telearuba. Tambe a dirigi e departamento di noticia por completo. E tempo ey, e gobierno di Antiyas cu nos tabata pertenece na dje, a plan pa habri un transmisor via Tele-Curacao, cu asina e comunidad di Aruba tambe por a wak Tele-Curacao. Pero Aruba a para firme na su decision y a dicidi cu nos no mester un stacion transmisor, pero un stacion di television chikito. Aruba su deseo a wordo cumpli y a cuminsa cu 12 empleado. E staf di Telearuba tabata inclui empleadonan di Tele-Curacao y esnan local. E tabata ricibi asistencia tecnico for di Tele-Curacao (PJC-TV) y finalmente a habri oficialmente dia 29 di september 1963. E anochi aki tabata un exito cu hopi charla y declamacion, pero desafortunadamente a encontra varios problema serio di interferencia cu canal di Venezuela. El a habri riba canal 12 y a ricibi algun conflicto cu su transmisor di menos capacidad cu esun di Venevision na Venezuela cu tambe tabata opera riba canal 12. Un opcion tabata pa hisa e capacidad di e transmisor, pero a lo largo a pidi permiso pa transmiti su programanan riba un diferente canal, esta canal 13. Te awe ainda e ta e canal oficial di Telearuba.

E tempo ey Telearuba tabata transmiti na preto cu blanco y cu no tabata nada facil pa motibo cu mester a usa aparatonan anticua pa trece e programanan. Despues, dia 12 di juli 1973, a bay na color, mientras cu Radio Caracas TV y Venevision TV ainda tabata transmiti na preto cu blanco. Cu e status aparte na 1986, Telearuba a incorpora y no tabata pertenece mas como parti di "Antilliaans Televisie Maatschappij, ATM-Tele-Curacao. Dia 14 di september 2004, SETAR, nos compania di telecomunicacion nacional a compra Telearuba. Den un periodo cortico a reorganisa y renoba parti di e edificio. Cu tur e storia aki mi kier a pone un tiki enfasis pa muestra den ki situacion e pioneronan na Telearuba mester a traha pa awe nos por ta orguyoso di tin un bunita planta di television nacional.



(Ronny cu su nieto)

Ronny tabata un di e co-fundadornan di Aruba Press Club. Despues di su trabou na Telearuba, el a bira un di e prome Relacionista Publico di Aruba Airport Authority. Eynan el a traha te ora cu el a baha cu pensioen. Gosando di su pensioen, el a ser pidi pa gerencia di Solo di Pueblo pa traha como reportero di noticia internacional unda e tabata traduci e noticianan aki pa dicho publicacion. Den su oranan liber, despues di morto di su casa Noni Brete, el a haci hopi trabou pa Parokia Santa Anna na Noord como un boluntario. E ultimo biaha cu ami a topa y combersa cu Ronny tabata riba un dia mainta cu mi a uni cu e grupo di Camarada y famia pa pone un

krans na honor di Sr. Elias Lacle, un victima di guerra, anto Ronny mester a bin habri e porta di santanta pa nos.

Ronny a yega di fungi como maestro di ceremonia pa varios organisacion, por ehempel eleccionnan di Miss Aruba, unda e tabatin e honor di comparti y anuncia e ganadornan. Despues di un tempo di lucha cu su salud, e conocido Ronny Brete ta bay laga nos, un atardi, dia 1 di October 2013, na un edad di 74 aña.

Asina tabatin varios persona den nos comunidad cu a traha incansablemente den medionan di comunicacion y mi no kier cuminsa menciona nomber pa mi no lubida uno. Pero mi ta spera cu pronto lo mi bin cu mas relato riba nos baluartenan cu antes a lucha asina duro pa duna nos loke nos tin awe.

Dufi Kock
Escritor y Historiador